

## 每週經課朗誦經文（巴克禮台語漢字）2012/04/01

### 共同經課-1 以賽亞書五十五章四節～九節 a

4 主耶和華賞賜我受教示者的舌，互我知怎樣用言語扶助厭倦的人。主逐早起叫醒，叫醒我的耳孔，互我會聽，親像受教示的人一樣。5 主耶和華開通我的耳孔；我並無違逆，亦無退後。6 人拍我的尻脊骹，我出在伊拍；人掇我嘴鬚的嘴鬚，我出在伊掇；人凌辱我，給我呸涎，我亦無掩面。7 因為主耶和華的確幫助我，所以我無見誚。為著按呢，我互我的面硬親像呂石；我亦知我的確無致到漏氣。8 稱我做義者近啦；是誰及我相爭，伊通及我相及倚；是誰做我的對敵，伊通就近我。9 看啊，主耶和華欲幫助我。

### 共同經課-2 詩篇三十一篇九節～十六節

9 耶和華啊，我佇患難中，求你憐憫我；我的目矙因為憂悶拍歹，我的心神我的身體亦是按呢。10 我的生命因為憂苦來消無；我的年歲為著吐氣亦按呢。我的氣力因為我的罪惡來衰騰；我的骨頭亦枯焦。11 我因為我一切的對敵成做凌辱，佇我的厝邊兜閣卡傷重；許個識我的人攏驚我，佇外面看見我的人走閃離開我。12 我親像死人，互人袂記得，無人數念；我親像破碎的器具。13 因為我聽見多人的誹謗，四圍攏是驚惶；in 相及參詳攻擊我的時，就計謀欲害我的生命。14 耶和華啊，我猶原倚靠你；我講：你是我的上帝。15 我的遭遇佇你的手；求你救我脫離我的對敵的手以及窘迫我的人。16 求你互你的面照光你的奴僕，照你的慈愛拯救我。

### 共同經課-3 腓立比書二章五節～十一節

5 恁著有基督耶穌的心做心；6 伊本有上帝的形狀，無掠及上帝平等做所著執守的；7 反轉傾空家己，取奴僕的形狀，成做人的樣相；8 已經有親像人的款式，就屈家己，順服到佇死，甚至死佇十字架。9 所以，上帝高升伊極高，賞賜伊彼個名搬(pôa<sup>n</sup>)過佇萬名的頂面的，10 互見若佇天、佇地，及佇地下的，佇耶穌的名無一個腳頭窩姆跪拜，11 無一個嘴姆稱呼「耶穌基督做主」，來歸榮光父上帝。

### 共同經課-4 馬可福音十五章一節～三十九節

1 到天光，許個祭司頭、長老、經學士及全公會相及議論，縛耶穌，帶伊去交互彼拉多。2 彼拉多問伊講：「你是猶太人的王嗎？」伊應講：「你講就是。」3 祭司頭用多多項告伊。4 彼拉多閣問伊講：「你攏無應嗎？你看，in 告你許多項。」5 若是耶穌猶久無應，致到彼拉多奇怪。6 到節期，總督應有放一個犯人互 in，照 in 所求的。7 有一人名巴拉巴，及許個作亂的人同受縛。in 佇作亂的時，曾劊死人。8 眾人就起，去求彼拉多照常來行。9 彼拉多應講：「恁愛我放猶太人的王互恁嗎？」10 因為知，許個祭司頭是為著怨妒才解送伊。11 若是許個祭司頭使唆眾人，寧可求放巴拉巴互 in。12 彼拉多閣應講：「按呢，就恁所叫做猶太人的王的，我著怎樣辦伊？」13 in 閣喉叫講：「釘伊佇十字架！」14 彼拉多給 in 講：「怎樣啊？伊做甚麼歹？」總是 in 愈大聲喉叫講：「釘伊佇十字架！」15 彼拉多因為愛互眾人歡喜，就放巴拉巴互 in，已經鞭拍耶穌，就發交去釘十字架。16 兵丁拖伊入院內，就是公堂就會齊通營。17 用紫色的袍互伊穿，閣編刺仔的冕旒給伊戴，18 就給伊請安講：「猶太人的王，平安！」19 閣用蘆竹揸伊的頭殼，給伊呸涎，跪落拜伊。20 戲弄息，彼領紫色的袍就給伊褪起來，將伊家己的衫給伊穿落去，帶伊出，欲釘伊十字架。21 有古利奈人西門，就是亞力山大及魯孚的老父，對山場來，按遐過，in 勉強伊相及去，來夯耶穌的十字架。22 in 帶耶穌到各各他的所在（翻譯就是頭殼碗的所在），23 用攪沒藥的酒互伊，耶穌毋受。24 就釘伊佇十字架，分伊的衣服，拈鬮看甚麼人得著甚麼。25 彼時九點鐘就釘伊佇十字架。26 用斬條寫伊的罪狀，講：「猶太人的王。」27 也有二個賊及伊同釘十字架，一個佇正旁，一個佇倒旁。28 {這應驗經上的話說：『算伊及不法的人同列。』[台語羅馬譯本無此節！]} 29 經過的人褻瀆伊，搖頭講：「唉啊！你毀壞殿，三日起伊的，30 今著救家己，對十字架落來！」31 許個祭司頭及經學士也是按呢恥笑伊，相及講：「伊曾救別人，也袂會救家己。32 以色列的王基督，今著對十字架落來，互阮看，來信伊。」同釘佇十字架者也罵伊。33 日中晝，全地黑暗，到三點鐘的時。34 三點鐘的時耶穌大聲叫講：「以羅伊！以羅伊！拉馬撒巴大尼？」（翻譯就是：我的上帝！我的上帝！你啥事放離我？）35 邊頭倚者，有人聽見就講：「你看，伊啲叫以利亞！」36 有一人走去，用海絨浸醋，緒佇蘆竹仔尾，互伊吸，講：「且慢，試看以利亞來救伊落來抑無。」37 耶穌大聲叫，氣就斷。38 殿內的帳簾對頂到下裂做二旁。39 百總倚佇耶穌的對面看見伊按呢氣斷，就講：「此人真正是上帝的子！」